

地350
42
部2278

第七十八冊

卷一百三十七

學制考七

新纂雲南通志

盧漢題

簽



新纂雲南通志卷一百三十七目錄

學制考七

近代學制

學務機關

省學務機關

縣學務機關

各級學堂

中等以上學堂

高等學堂

優級師範選科

方言學堂東文學堂

新纂雲南通志

卷一百三十七

學制考七

目錄

法政學堂

工礦學堂

中等學堂

中學堂

師範學堂

實業學堂

中等以下學堂

初等小學

高等小學

土民學塾

職業學堂

蒙養園

私立小學

圖書館博物館

教育總會

留學生

國外留學生

留日學生

留歐美學生

國內留學生

新纂雲南通志卷一百三十七

學制考七

近代學制



近代學制始於西力之東漸明代中葉以後西教來華即間設學校以宣揚教義嘉靖三十六年葡萄牙佔澳門以後外國資本勢力日漸侵入國內經濟政治社會均起劇變舊日學制自難墨守清末外戰屢蹶國勢日絀變法圖強之議遂以日熾同治間已有京師同文館上海廣東廣方言館湖北自強學堂上海機器學堂之設光緒五年以後則有天津電報學堂武備學堂十三年以後則有北洋大學南洋公學等先後創立至甲午大創德宗親政乃銳意維新光緒二十四年戊戌四月詔籌設京師大學堂並於上海開編譯局又派孫

家鼐爲管學大臣五月詔各省府廳州縣大小書院一律分別改爲高等及中小各學堂然未幾政變突興新制遂以中斷庚子拳亂國幾不國守舊者奪氣於是戊戌新政復活光緒二十七年十二月派張百熙爲管學大臣擬訂學堂章程約分六級曰蒙學堂曰尋常小學堂曰高等小學堂曰中學堂曰高等學堂曰大學堂蒙學堂修業期限四年課程爲修身字課習字讀經史學輿地算學體操八科得徵收學費每人每月不得過三角小學堂尋常高等各三年尋常小學課程爲修身讀經作文習字史學輿地算術體操高等小學於以上數科外又有讀古文辭理科圖畫或加一二農工商實業科目而除去古文辭學額每校以五百人爲限每班不得過六十人不收學費高等小學以外另設簡易農工商實業學堂以容納不入高等小

學之尋常小學卒業者中學堂容納高小卒業生以府治設置爲標準修業期限四年中學堂以外另設中等農工商實業學堂以容納不入普通中學堂之高小卒業生又設師範學堂以造就小學教習中學堂於第三年起得設實業科以便卒業後可入高等專門實業學堂中學課程爲修身讀經算學詞章中外史學中外輿地外國文圖畫博物物理化學體操師範學堂則每星期減去外國文三小時加教育學及教授法三小時學額每校以八百人爲限每班不得過五十人在五年內官立中學暫不收費高等學堂爲分科大學之預備容納中學卒業生與京師大學預備科性質相同以省會設置爲標準修業期限三年高等學堂以外得設農工商醫高等實業學堂以容納卒業於實業科之中學生又得附設仕學館及師範學堂其

課程分政藝兩科政科爲倫理經學諸子詞章算學中外史學中外輿地外國文物理名學法學理財學體操藝科爲倫理中外史學外國文算學物理學化學動植物學地質及礦產學圖畫體操此外仕學館爲算學博物物理外國文輿地史學掌故理財學交涉學法律學政治學師範館共四年爲倫理經學教育學習字作文算學中外史學中外輿地博物物理化學外國文圖畫體操學額每校定八百人以上每班定四十人初設立時暫不收費京師大學堂最高爲大學院不定年限其次爲大學專門分科修業期限三年至四年又其次爲大學預備科得附設仕學館師範館及醫學實業館與高等學堂完全相同大學專門分科爲一政治科二文學科三格致科四農業科五工藝科六商業科七醫術科各科又復分目計政治科分爲

政治學法律學兩目文學科分爲經學史學理學諸子學掌故學詞章學外國語言文字學七目格致科分爲天文學地質學高等算學化學物理學動植物學六目農業科分爲農藝學農業化學林學獸醫學四目工藝科分爲土木工學機器工學造船學造兵器學電器工學建築學應用化學採礦冶金學八目商業科分爲簿記學產業製造學商業語言學商法學商業史學商業地理學六目醫術科分爲醫學藥學兩目學額專門分科不定額預備科二百名速成科三百名共五百名當時科舉未廢學校出身亦給以科第規定高小卒業覆考如格給予附生中學卒業覆考如格給予貢生高等學堂卒業覆考如格賞給舉人大學分科卒業覆考如格賞給進士同時對於科舉出身人員亦定有變通辦法凡進士得歸仕學館舉人得選

入高等學堂貢生得入中學堂附生得入小學堂以上即所謂欽定學堂章程也頒行於光緒二十七年十二月至二十九年十一月即行廢止實一具文耳光緒二十九年閏五月又派張之洞會同張百熙榮慶釐訂學堂章程張等彙定四編回奏奉准遂頒布全國奏定學堂章程與欽定學堂章程異點凡三一刪去蒙養學堂另訂蒙養院章程二詳訂師範學堂章程三詳訂農工商實業學堂章程而各項學堂之分科與科目亦多有更改蒙養院爲保育三歲以上至七歲幼兒之所附設於育嬰堂及敬節堂內兒童留院每日不得過四小時不收學費師範學堂分爲三種一優級師範學堂二初級師範學堂三實業教員講習所優級師範學堂以造就初級師範學堂及中學堂教員管理員爲宗旨學科凡三一公共科二分類科三加習

科公共科所以補充中學學程爲本科之預備加習科於分類科外
擇習與教育有關之數科以資深造分類科凡四類第一類以中國
文學外國語爲主第二類以地理歷史爲主第三類以算學物理化
學爲主第四類以植物動物礦物生理學爲主初級師範學堂以造
就初高等小學堂教員爲宗旨科目爲修身讀經及講經中國文學
教育學歷史地理算學博物物理及化學習字圖畫體操於正科外
附設簡易科一年畢業又規定優級師範附設附屬中學堂及小學
堂初級師範附設附屬小學堂以爲練習教授之場所實業教員講
習所以造就各實業學堂實業補習普通學堂及藝徒學堂之教員
爲宗旨分農工商三類農業及商業教員講習所二年畢業工業教
員講習所又分完全科與簡易科完全科分金工木工染織窯業應

用化學工業圖樣六科均三年畢業簡易科分金工木工染色機織
陶器漆工六科均一年畢業實業學堂分爲農業工業商業及商船
此外水產學堂屬於農業藝徒學堂屬於工業各種實業學堂分爲
三級曰高等實業學堂中等實業學堂初等實業學堂高等農業學
堂分本科及預科本科分爲三科一農學二森林三獸醫學如在墾
荒地地方更可設土木工程中等農業學堂亦分本預科本科分爲五
科一農業二蠶業三林業四獸醫五水產高等工業學堂之本科分
爲十三科一應用化學二染色三機織四建築五窯業六機器七電
器八電氣化學九土木十鑛業十一造船十二漆工十三圖稿繪畫
中等工業學堂本科分爲十科一土木工程二金工三造船四電氣五
木工六鑛業七染織八窯業九漆工十圖稿繪畫工業無初等學堂

而有藝徒學堂除普通科目外不限定何種工業科目視地方情形擇宜教授高等商業學堂之本科不分科高等商船學堂分二科一航海二機輪中初等商業與商船學堂之分科情形與高等同此外尚有與舊章特異者如大學本科舊章只有七科新章則另添經學科爲首而成八科經學科分爲十一門一周易二尙書三毛詩四春秋左傳五春秋三傳六周禮七儀禮八禮記九論語十孟子十一理學分經學習一如西漢博士制中小學堂則讀經一科改爲讀經講經此皆奏定章程與欽定章程特殊之點也此時期中之學制興革尙有重要者四一爲科舉制度之廢除光緒二十七年已改八股爲時務策論二十九年張之洞張百熙榮慶奏請漸廢科舉以收振興學堂之效三十一年袁世凱張之洞又奏請完全廢止旋奉諭旨自

丙午科_{二十三年}起所有鄉會試科歲考一律停止自是隋唐以來之科舉制度遂完全廢除矣二爲教育官制之改革當京師大學堂初成立時_{光緒二十四年戊戌}曾設有管學大臣管理大學堂事務兼節制各省設立之學

堂光緒二十九年改管學大臣爲學務大臣統轄全國學務而另設總監督以專管京師大學堂事務三十一年科舉停止設立學部其長官稱學部尙書並以舊國子監及禮部歸併學部次年規定官制三十三年更先後頒布教育官制章程及法令其中最要者爲各省學務官制教育會章程及勸學所章程等蓋至此而新式學制完成矣三爲教育宗旨之宣布光緒三十二年因學部尙書之奏請頒布教育宗旨以一人心而定趨向一忠君二尊孔三尙公四尙武五尙實並申明忠君即所以愛國尊孔以立道德之基礎尙公以提倡

公共合作之精神人人有尙武之精神則自強可以禦外侮能尙實則必講求富源期有益於國計民生云四爲留學制度之整理時因出洋留學學生日多遂倡立監督制及考試制光緒三十三年始派遣歐洲留學生監督次年派遣日本留學生監督又添加歐洲留學生監督員數分駐法德俄英諸國留學生考試分爲二種未出洋以前以考試考驗其合格與否已出洋畢業回國又有考試以爲入仕之預備光緒三十三年江蘇初舉行出洋留學生考試並許女生應考回國留學生考試最初由禮部舉行時爲光緒三十一年其後歸於學部賜以翰林進士舉人等出身五爲女學堂章程之頒行初奏定學堂章程僅將女學歸入家庭教育法未以明文規定學部設立奏請開辦女學者頗多光緒三十三年頒行女子師範學堂章程三

十八條女子小學堂章程二十六條女子師範學堂以養成女子學堂教習並講習幼兒保育方法期於裨補家計有益家庭教育爲宗旨學科爲修身教育國文歷史地理算學格致圖畫家事裁縫手藝音樂體操修業年限爲四年此外對於女生入學女生請假及外客參觀等均有嚴密規定女子小學堂以養成女子之德操與必需之知識技能並留意使身體發育爲宗旨分爲初等及高等修業年限統爲四年初高等並設者稱爲女子兩等小學堂女子初等小學堂之學科爲修身國文算術女紅體操外以音樂及圖畫爲隨意科女子高等小學堂之學科爲修身國文算學中國歷史地理格致圖畫女紅體操外以音樂爲隨意科所謂奏定學堂章程時期中之學制大畧如此由宣統元年迄三年關於學堂章程亦不少改訂其屬於

普通學制者一初等小學堂畢業期限由五年改爲四年讀經講經一科前二年廢止後二年只讀孝經論語宣統元年一二高等小學堂加授官話以爲統一國音之預備又通商口岸得於第四學年加授英文宣統二年三創辦簡易識字學塾以爲年長失學及貧寒子弟無力就學者讀書之所不收學費並由學塾發給應用書籍物品授課時間每日自一小時至三小時三年畢業得插入初小四年宣統元年四改良私塾以採用教科書與改良教法爲主且爲之定特殊課程以便應用宣統二年五中學堂課程分爲文實二科文科重經學實科重工藝宣統元年其後因教師及設備上之困難改訂兩科課程較爲普通宣統三年其屬於學制研究者爲訂定中央教育會章程並召集第一次會議中央教育會爲學部顧問機關以便徵集全國教育意見會員選自學部民政部海陸軍

部京師督學局各省提學使署各省學務公所職員以及學部直轄各學堂監督各省師範中小學堂監督教員堂長等任期三年宣統三年夏舉行第一次會議會員到者百三十八人議決要案十一件雖未幾革命軍興清廷顛覆而議決各案亦多爲以後革新教育之張本焉

清季學制自光緒二十八年至宣統三年共十年間均時時在改進中然大體則直接仿自日本間接仿自德國者耳滇省自光緒二十八年亦已遵章籌設學堂迄宣統間始粗具規模計先後設置中等以上學堂數所各府直隸廳州亦各有一中學固非全無成績者惜光復之役學署被燬案牘無存茲僅就民國十二年教育司雲南教育概況宣統三年學務公所教育官報光緒三十二年楊觀東教育

行政雜誌及他種散亂零落之刊物悉心搜討擇要編入未能賅備至學務經費別詳財政考

學務機關

省學務機關

清光緒二十八年雲南始籌辦學堂次年成立高等學堂是時尚無特設之學務機關即以高等學堂兼辦全省學務事宜逮光緒三十二年部議設立學務處總理全省學政將高等學堂兼辦之行政事務劃歸學務處辦理至是始有獨立之學務機關學務處之組織置總理總參議各一下設六處各司其事焉茲將其組織系統及職員姓名表之如下

學務處	總理	陳燦 陳榮昌					
	總參議	陳燦 陳榮昌					
	處別	專門教育處	普通教育處	實業教育處	審定處	文案處	會計處
	職員姓名	楊觀東	孫光庭 錢用中 秦光玉	楊觀東	錢用中 秦光玉	楊觀東	張舜琴

光緒三十三年學部奏設提學使司統轄全省學務將舊有之學務處裁撤改設學務公所隸屬提學使司提學使雖為督撫屬官然有督飭地方官辦理學務及獎懲勤惰之權其職權視學務處較為擴大學務公所設議長一人議紳四人佐提學使參畫學務并備督撫諮詢其於行政方面則分置總務專門普通實業圖書會計六課總

務課掌辦機要文件編纂統計報告考核學堂職教員及不屬各課事務專門課掌理高等學堂及各種專門學堂教課設備等項及獎勵各種學術技藝海外游學事務普通課掌理優初級師範學堂及各中小學堂教課設備等項并通俗教育家庭教育博物館等事務實業課掌理各種實業學堂并考查本省實業情形籌畫擴張實業教育費用圖書課掌理編譯教科書參考書并圖書館博物館等事務會計課掌理一切經費之收支稽核并學堂營造事務每課設課長副課長各一及課員若干人此外又於提學使下設省視學六人承提學使之命令巡視各州縣學務雲南之有省視學蓋自此始學務機關蛻變至此頗形進步組織漸趨完備亦時會使然也學務公所各課職列表如下

課別	課長	副課長	課員
總務課	李廷棟 浙江雲南	馬鯤 四川	汪紹洋 順天雲南 趙榮宗 雲南 宋家棟 直隸
專門課	劉顯治 貴州	區天瑞 廣東	許端夔 順天
普通課	周鍾嶽 雲南	秦光玉 雲南	李文清 雲南 張世禔 湖南 葉祖侗 四川
實業課	錢用中 雲南	吳暹 雲南	
圖書課	葉瀚 浙江	秦光玉 雲南	雷光煒 江西雲南 章紹賢 雲南 朱黻清 雲南
會計課	張舜琴 雲南	丁燦南 雲南	秋應離 陝西

光緒三十四年七月學部通飭改課為科其課長課員名稱亦即改為科長科員自是而後迄於學務公所裁撤均無若何變動僅人員之更調而已今將學務公所自宣統元年三年歷任人員表之如下

二條各屬勸學總董均照章改稱勸學員長云

案宣統三年曾有飭用教育官練習所學員及請暫緩檢定小學教員兩文均可考見當時教育行政之一斑今併附於後

附提學使葉爾愷呈報派用文

教育官報
四十四期

爲呈報事案據卸充教育官練習所所長兼講員學務公所圖書科科長丁憂揀選知縣舉人秦光玉稟稱前奉司札轉奉憲台批據新委迤東省視學學務公所實業科科長昆明舉人錢用中稟因病辭職請委秦舉人充教育官練習所所長各緣由一案除原文有案邀免冗錄外後開至所請札委秦舉人充教育官練習所所長兼講員一節亦蒙允准即由司給札委充飭令該所長與講員等會商酌增教授時間並與迤東各屬士紳切實討論改良學

務辦法以謀進步等因奉此舉人遵即於六月初一日到教育官練習所所長兼講員差與所中講員王舉人肇奎東舉人用中共同商推東舉人所講授者係教育學教授法兩項王舉人所講授者係管理法日本教育制度兩項於教育上應有之知識蓋已粗備矣然使不明我國現行之學制則雖諳悉學理而所籌所辦之事亦往往與定章相違動遭駁斥况自學部成立以來從前頒布之章程其中已屢有增損屢有變更欲執舊章以辦新學亦枘鑿而不適於用舉人乃添講中國學校制度一項每星期加四點鐘與各屬學員討論現行學制而於兩等小學簡易識字學塾私塾改良各章程言之尤詳誠以此三者爲各屬學務趕辦之要件與教育普及有密切之關係而爲憲政進行之基礎者也惟是一屬

學務以勸學所爲總機關而勸學所辦理之善否即視乎總董之得人不得人訪聞迤東之曲靖東昭所屬勸學總董除宣威州之符廷銓大關廳之龔炳文尙能稱職外其餘各屬總董或係把持之劣紳或爲頑固之學究致使一邑學務竟無發達之望言念及此殊堪浩歎舉人爰就各屬學員中於每日功課之暇更番晤談以觀其言論舉止於每星期日出題試驗以覘其學問文章更由各方面訪問以察其平素之學行才具如何求其堪備總董之選者約有二十一人現已畢業事竣各學員陸續回籍謹將二十一人姓名另摺開呈查核如蒙甄錄擬請札飭各該地方官存案倘查明現任總董辦學不力應行更換即由摺開各學員中再就地覆查加具切實考語稟請憲台加札委充該屬總董庶勸學所得

人各屬學務可望有發達之一日矣所有遵札添講中國學校制度及採訪學員中堪備總董之選者開摺呈備甄錄各緣由是否有當理合稟請憲台俯賜查核批示飭遵計呈清摺一扣等情據此查滇省各廳州縣應設之勸學所現已一律成立所需視學員兼勸學總董爲補助教育行政機關擔負至重設不認真選派隨時考核恐誤教育前途前於自治研究所內附設教育官練習所取便各學員研究自治四小時外餘二小時肄習教授管理諸法原爲培養此項人材起見業經畢業四班嗣屆調取第五班學員到省講習自治特由司遵批札委該舉人充教育官練習所所長與舉人王肇奎束用中共同講授教管諸法並酌加鐘點添講中國學校制度討論現行學制尤注重兩等小學簡易識字學塾私

塾改良各章程亦經畢業考試榜示在案現據該舉人查明五班學員中堪備總董之選者共得二十一人開摺呈核前來應准札飭各該地方官存記如現充總董有不勝任者即以摺開之員稟司札委以期教育進步據稟前情除批示並札各廳州縣存記派用外理合照錄清摺具文呈請憲台俯賜查核爲此呈乞照驗施行須至呈者

附總督李經羲准學部咨分擬年限報核文

教育官報
四十四期

爲札行事宣統三年三月初八日准學部咨普通司案呈准咨開據提學使詳稱滇省風氣晚開師資缺乏本司前於光緒三十三年三月到任查悉情形乃將省城原有之高等學堂改爲兩級師範學堂並通飭省外各府直隸州認真辦理初級師範學堂原爲

培養師資起見祇以人財兩乏未能一律舉辦故各屬小學教員猶是供不逮求從權辦理准由各地方官選擇師範畢業生外再擇文理明暢略通經義及粗淺歷史地理大要淺近算術者暫行充任其有他省來滇投効之師範生亦隨時試驗委派此時合格教員不可多得實屬無從檢定擬俟兩年後各屬師範畢業學生漸多研究教育者亦不乏人再遵章切實舉行以符通案理合將滇省師資缺乏請暫免檢定及展緩年限緣由詳請查核咨覆學部核定並祈批示祇遵等情到本督部堂據此相應咨請查照核覆施行等因前來查本部奏定檢定小學教員章程第十四條於風氣晚開之偏僻地方本可酌量從緩惟其免行檢定地方及展緩年限應由提學使司察明妥定呈部備核滇省地處邊徼雖難

如期舉行檢定但幅隕廣袤風氣通塞不一斷無通省一律緩期二年之理應由該提學使體察各地方情形分別擬定展緩年限報由本部核奪並於未行檢定地方查照原章所定暫充小學教員資格發給執照以符略示限制之意相應咨行貴督查照轉飭提學使司遵照可也等因到本督院准此合就札行爲此札仰該司即便遵照辦理特札

各級學堂

滇處西南邊徼風氣晚開設學之初大都因陋就簡各級學堂多係就原有之書院義塾改設校舍校具圖書儀器等均缺焉不備學科課程亦無一定各項教師皆科舉中人其經史稍有根柢及兼略讀翻譯西書者即稱爲中西兼通不可多得之人物名雖學校實則義塾書院而已自光緒三十二年聘日人江部池田河合島田加古諸氏充高等學堂及法政學堂教習始有科學教育同時滇人之留學日本及本國北京大學肄習師範者相繼歸來漸圖改良迄於清末始粗具規模焉茲爲分別性質程度敘述如後

中等以上學堂

高等學堂

光緒二十九年二月就五華書院改設高等學堂設總理一員副辦一員監督一員總教習一員分教習六員收支一員其時各府廳州縣中小學堂尙未一律開辦高等學堂學生非由中學堂升進僅就通省舉貢生童中擇其文理清通年力富強者或由省城考取或由各地方官申送者入之其課程中學之外僅有英法日文算學體操

等項餘皆闕如

據雲南教育概況稱初設理財兵學交涉三科

光緒三十二年添聘日本教習三員一

文科一數理化科一博物科普通科學於是換備舊有英文兩堂法文兩堂東文兩堂生徒共一百八十名是年併英文爲一堂法文爲一堂東文前已併爲一堂今仍舊堂各六十人其舊有之學生中因事請假及出洋游學空額以補習科及初級師範學生補之稱爲普通部又附設優級師範三堂每屬選送舉貢生員之文理明通品行端正志在教育者各二人計十四府三直隸州五直隸廳七十二州縣凡有學額之處俱照章送省考驗入堂肄業約百八十餘人名曰師範部

以上據雲南高等學堂改良章程及楊觀東教育行政雜誌編

附學務處總理陳燦瀝陳雲南學務及改良高等學堂情形詳文爲瀝陳雲南學務及改良高等學堂情形詳請據奏事竊查雲南

之改書院爲學堂於光緒二十八年經營創始二十九年二月開學其時高等學堂設總理一員副辦一員監督一員總教習一員分教習六員收支一員入堂生徒或就省城考選或由各府直隸廳州縣選送舉貢生監中之文理清通品行端正者肄業其中以一百八十人爲額而全省學務皆統於高等學堂總理是年又創辦省會小學三十三堂別設小學堂監督一員三十年復創辦東文學堂設監督一員收支一員中文教習二員日本教習二員學生六十人又前後兩次派留學日本之普通科學生二十人又以各學堂辦法教法未能合宜究其原因一在開端未從初等高等小學下手故各府雖不乏已設之中學堂然升入之學生全由考選程度多不合格高等學堂亦然一在開辦學堂未先從師範入

手故不但一切辦法諸多未備教法亦勞而少功乃選派速成師範生四十一人赴日本學習辦法教法及諸科學之大要又派赴日本學陸軍者二十八人學實業者二十人三十一年從留學日本雲南全體留學生之請以在籍翰林院編修前貴州學政陳編修咨赴日本考察學務並添派學生十二人赴日本分習陸軍鐵道警察法政合前後數次所派留學日本者約百數十人又於省垣添設初級師範學堂蠶桑學堂實業學堂半日學堂補習科學堂各一校均具詳在案此二十八年至三十一年雲南學務情形之大略也三十二年正月陳編修歸自日本其卒業之速成師範生亦先後偕歸因隨時諮商改良學堂辦法我憲台以前日通省學務混合於高等學堂總理權限之中係一時權宜之計不能不

特設而分立之_{本司}於本年二月奉憲台札開委辦通省學務處並照會陳編修爲本處參議到差以來時以學務重鉅不克負荷爲虞因遵照定章及參照直隸學務處章程分學務處爲普通游學專門實業審定會計文案等處均經委紳分任在案然當開辦伊始學務處及各學堂一切應有規則若不明定章程匪惟無所適從而辦法教法歧出亦非整飭學務之道當經擬就各章程數則詳請鑒定在案至現辦學堂宗旨以養成教員爲第一要義除高等學堂附設優級師範部百八十餘人外就省城初級師範學堂改設省會師範傳習所一處並飭各府直隸州分設師範傳習所共十七處均派速成師範生充當教員以養成小學堂教員爲主義並於師範傳習所附設教員講習會使現充中小學堂教員者

入而講習以期教法畫一並附屬單級教授多級教授小學堂以爲師範學生實地練習之資計省會師範傳習所生徒額數一百二十人暫以六個月卒業嗣後即改爲一年府直隸州各校額六十人以一年爲卒業因速成師範不敷分佈各直隸廳均暫附鄰近府分傳習所俟一二年後再行特設滇省風氣遲開且經費支絀各府直隸州中學堂有因設立師範傳習所不能兼顧遂移其經費而暫緩設中學者且教員乏人其現設者亦未盡合宜本司體察其經費困難實情未便深爲嚴究惟飭設法籌集款項俟師範傳習所生徒卒業則教授有人而中學堂即萬不可缺並隨時推廣以冀教育之普及現奉憲台札諭准學部電開方今振興教育以小學堂爲基礎而教員亟須養成故師範尤要應請迅將省城師範名額盡力推廣至少設一年卒業之初級簡易科生五百人以養成小學教習並設二年卒業之優級選科生二百人選科中分四類一歷史地理二理化三博物四算學每類學生五十人以養成府立師範學堂中學堂教習並須附設五個月卒業之體操專修科授以體操遊戲教育生理教授等法名額百人以養成小學體操教習等因奉此本司查雲南現於省城設立省會師範傳習所一校府直隸州共設十七校與部章全力注重師範之意合省城師範傳習所生徒一百二十人外屬傳習所各六十人計十七處應得生徒九百二十人合諸省垣師範傳習所共應得一千零四十人之數較部章省城設一年卒業之初級簡易科生五百人已多一倍而有餘查師範傳習所課程即遵照定章之簡易科設

於省城者暫以六個月卒業外屬所設以一年卒業是科學學年均與部章合查高等學堂之附屬師範係仿奏定優級師範章程分爲三類第一類以地理歷史爲主第二類以算學物理化學爲主第三類以植物動物礦物生理學爲主生徒百八十餘人以五年卒業按之部章設二年卒業之優級選科生二百人之例額數雖少不符然修業年限既久於部章則程度自因學年而較高且按諸課程分類之大致亦不謀而合矣惟五個月卒業之體操專修科一層尙須添設現已通飭府廳州縣各選送一人限五月內齊集其操場即擬就貢院爲之此本年雲南學務情形之大略也查高等學堂雖經開辦三年而滇省邊遠教員難得故科學未全除東文學堂法政學堂均聘日本教習各二員外現高等學堂亦

添聘日本教習三人科學可臻完備爰將高等學堂前後六堂學生約一百八十人併作三堂爲普通部另由各府選送學生一百七八十人分作三堂爲優級師範部普通爲入高等專門之地師範爲預備中學及初級師範教員之選皆遵照部文不給獎資但作爲正額免納火食學費堂中一切教育用品約購有萬餘金之譜此改良高等學堂情形之大略也本司蒙憲台委任所有學務事宜固不敢過事鋪張虛糜經費亦不敢因陋就簡阻碍進步奉札前因所有雲南學務及改良高等學堂情形理合會同布政司瀝陳概要可否據詳入奏之處伏乞憲台俯賜查核批示祇遵爲此呈乞照詳施行須至詳者

案學務處總理係按察司陳燦兼任故詳文稱本司

師範選科

光緒三十三年改高等學堂爲兩級師範學堂就原有學生及東文學堂學生考取二百五十名稱優級師範選科以養成中小學教員爲主旨分爲四類一歷史地理二理化三博物四文學教育除理化一類特開雙班共一百人外其餘各類均係五十人另招一年與二年畢業之初級簡易科及五年畢業之初級完全科各四班宣統元年優級選科畢業續辦第二屆分爲五類一歷史地理二理化三博物四數學五英文至民國元年畢業本省中等學校之教員多取材於此兩屆之畢業生云

以上據雲南教育概況編

附學部奏議覆滇省優級師範選科學生畢業請獎摺

雲南教育官報四十一期

奏爲遵旨議覆恭摺仰祈聖鑒事內閣抄出護理雲貴總督布政

使沈秉堃具奏滇省優級師範選科學生畢業照章請獎一摺奉硃批學部議奏欽此欽遵抄交到部原摺內稱滇省兩級師範學堂優級選科學生畢業計理化類第一班最優等九名優等三十名中等二名第二班優等三十二名中等十名下等三名歷史地理類最優等一名優等二十六名中等十四名博物類最優等八名優等十八名中等十九名文學教育類最優等一名優等十三名中等二十六名下等二名除每班各開加習科督令該生等加習一學期俟明春派往各府廳州縣充當教員外擬請敕部照章核獎等因嗣准該督咨送該生等履歷分數表畢業試卷到部臣等查定章優級師範選科畢業考列最優等者比照優級師範中等獎勵辦理考列優等中等者比照優級師範下等辦理該省優

級師範選科期滿畢業並加習一學期自應照章核辦臣等當經督率司員將各生畢業試卷分門覆校記分寬濫者嚴加核減並查照臣部上年奏定端就主課計分降等新章將主課分數太少者遵章分別降等計最優等理化科第一班鄭崇賢繆爾紆許贊堯左白箴李潤東方際熙袁不鈞等七名歷史地理班余登瀛一名博物班謝顯琳馬秉豐陳光熙雷協中王用予孫孝祖等六名文學教育班汪學謙一名擬請比照優級師範中等獎勵辦理作為師範科舉人以各部司務補用令充中學堂及程度相當之各項學堂正教員俟義務年滿以應升之階分別京外分部分省儘先補用其理化科第一班列入優等之華時俊陳秉仁湯源新楊潤蘭周謨彭嘉猷張欽漢陳震李樹勳戴澍春郭煥華春芬劉盛

埴趙國政段定元張恩祥李承謨武臣榮孫肇宗盧金錫李豔東孫必光郭從光殷維翰董鴻章李相家魏登雲錢尊槪袁不基張家驥向恆益等三十一名中等劉復曾陳永康何裕如等三名第一二班優等楊綦李文楨胡作霖牛鑑清李錫桐孫模蔡紹邕周效虞尹彬葛士英楊德彬段箴孫繼華駱元勳傅澤著姚祖虞王建中雷宗燕郭光文陳春芳李蓮李應恆張萬青楊元昌陸映婁馬壽星等二十六名中等許得周姚鴻基黃嘉績江寶邵光阜孫清蔭雷秉衡李鵬元何光欽蘇芬張振勳李毓琨蘇興遠王鎮藩楊尚清梅南先等十六名歷史地理班優等劉慶福趙汝霖楊鍾煊湯祚張世績李仲選丁績鄧之誠張恭材李燦王乃明王應元周之屏李崇勳武士敏劉啓瑞張應杓董廣訓杜詩清楊耕李承緒

完文彬蕭春先鄭毓梅李潤膏等二十五名中等李國璋李家梓
周文郁張雲龍趙思義李毓春吳尙友萬邦協高蔚藻周鍾岐趙
思忠徐雁聲張耀奎常儒業等四十名博物班優等段文達陸懷
德趙國璽趙字唐劉芾李孔融王璧楊以信范欽文朱宗蠡林紹
美趙永泰趙厚培李鳳文徐增福李子豫和耀奎倪文瀾等十八
名中等楊佐清王燿孫恆恭何振基方樹屏宦錫侯楊國林范寶
賢甘受和袁忻然張芝劉嘉瑜王本能王萬寶常本嶸鄧樹東吳
文瀚潘有德趙魏嫺楊開瀚許振時等二十一名文學教育班優
等太運震楊純健桑卽棟錢大中林慎莊汪錫龍楊萬和朶鍾瑾
王國靖張瑞璠楊景福唐文光等十二名中等王永祚何鍾英常
敏業孫汝相楊其琨周錫琦彭陞榮黃國興馬德驥李開德楊學
伊黃祖德周丕義張益明李朝瑾劉汝賢廖宗彭朱轍袁咸熙張
華熙陳派衍王鑠張福源何士林王祖榮晉顯廷等二十六名擬
請比照優級師範下等辦理令充中學堂及程度相當之各項學
堂副教員或高等小學以下各項學堂正教員俟義務年滿作爲
師範科舉人獎給中書科中書銜其列入下等各生照章勿庸議
獎如蒙俞允卽由臣部欽遵分行遵照辦理所有議覆雲南優級
師範選科獎案緣由謹恭摺具陳伏乞皇上聖鑒再此案因畢業
日期在臣部奏定調考新章以前是以最優等未經調考合併陳
明謹奏宣統二年十二月十九日奉旨依議欽此

方言學堂東文學堂

光緒二十五年奏設武備學堂於堂內附設方言學堂專授外國語

爲留學之準備嗣復另設東文學堂旋併入方言學堂迄武備學堂改爲陸軍小學堂於是方言學堂遂獨立分爲日英法三科至宣統元年改辦高等學堂除本科外附設實科中學辛亥光復停辦就原有學生中擇其成績優者改辦日英法文專修科其餘則併入第二屆優級師範選科作爲英文類專修科一年畢業送日本歐美留學雲南之有歐美留學生自此始

以上據雲南教育概況編

附巡撫林紹年等設立東文學堂片

據雲南高等學堂總理署布政使陳燦詳據在籍翰林院庶吉士羅瑞圖編修陳榮昌等呈稱滇省先後資送出洋學生雖已百數十人但或習專門或習普通或習速成師範或習武備以通省百十州縣分之勢仍甚不敷用而邊瘠財力有限再籌資送甚屬爲

難聞東洋學生在上海東亞同文書院畢業者實繁有徒各省亦多延爲教習滇省亟應仿辦當經請撥官費由該紳等公同聘請茲由上海聘定東洋畢業學生高島迫田二員來滇充當普通中學教習就三迤會館開辦名曰東文學堂將來卒業資送便可直入專門每員認教學生三十人學期訂定三年一切束修數目及應約條款已立合同該教習於十月初四日到滇定于二十日開辦仍歸管理學務官員考察查奏定學堂章程內載中學堂畢業生經督撫學政會同覆考合格者最優等作爲拔貢優等作爲優貢中等作爲歲貢分別升入所升學堂肄業填給執照下等作爲優廩生最下等遣回原籍等語此項東文學生俟三年畢業擬請准照官立中學堂之例考其合格者照章分別給予各項出身用

示鼓勵而收實效等情詳請具奏前來臣覆查無異除咨外務部禮部京師大學堂學務處查照外所有滇省設立東文學堂開辦各緣由謹會同雲貴總督臣丁振鐸雲南學政臣吳魯附片具陳伏乞聖鑒敕部立案施行謹奏

法政學堂

光緒三十二年就課吏館改辦法政學堂初設速成科分爲員紳兩部員部收納候補官吏紳部收納舉貢生員授以淺近之法政學說三十三年改訂辦法設一年半畢業之講習科三年畢業之別科及五年畢業之正科講習科仍分員紳二部嗣添刑幕一部調刑幕人員入堂講習正科因無合格學生未能開班宣統元年開辦別科又附設司法講習科一班二年講習科停辦添辦別科二班

以上據雲南教育概況編

工鑛學堂

宣統二年開辦高等工鑛學堂初招高等生一班中等生四班高等生招收本省及貴州優級師範選科之理化博物兩類畢業優等以下者入之光復後學生星散因而停辦改爲省會工業學校專辦中等後又改稱省立甲種工業學校

以上據雲南教育概況編

案大理府西雲書院曾改辦高等學堂後以辦理不合法飭作爲迤西中學堂又曾由學務處移迤西道議改兩級師範學堂並有迤西紳士等稟請緩辦迤西高等學堂暫移經費送學生出洋預儲師資均見楊覲東教育行政雜誌其結果如何無可稽考要之所謂迤西高等學堂者名不副實不得爲中等以上之學堂則於此可証也

中等學堂

中學堂

雲南所屬中學以普洱府中學堂創辦爲最早實始於光緒二十八年洎二十九年省會設高等學堂始通飭各府及直隸廳州一律籌設中學堂三十一年各府及直隸廳州均成立中學堂一所嗣因辦法不善於三十二年除省會外一律改辦師範傳習所省會一所名曰省會中學堂三十四年與師範傳習所合併改爲兩級師範學堂附屬中學另設雲南府中學堂一所宣統三年改爲模範第一中學堂於大理蒙自設第二第三模範中學堂又就方言學堂改辦之高等學堂內設實科中學清代之中學教育大略如此

以上據雲南教育概況編

附總督李經羲奏改良滇省中學堂暨初級師範學堂辦法分區

設立以資模範摺

見雲南教育官報四十期

奏爲改良滇省中學堂暨初級師範學堂辦法分區設立以資模範恭摺仰祈聖鑒事竊查學部奏報分年籌備事宜清單內開初級師範學堂各府中學堂均於宣統二年設齊等因分咨各省自應遵辦滇省自宣統元年五月間前署提學司郭燦呈報四項教育列表聲明宣統二年各府初級師範學堂一律設齊中學堂均各成立一所詳經前護督臣沈秉堃咨達學部一面通飭各屬分別照設疊據先後呈報成立各在案臣惟師範爲國民教育之源泉中學造普通完全之人格務期實事求是不在多立空名滇處邊陲開化最晚人款兩絀籌辦綦難各府初級師範暨中學堂雖經勉力辦成而按之實在情形往往因經費不敷教員難聘率不

免因陋就簡至中學一堂之內未能分設文實兩科辦理已多遷就加以學生人數太少程度不一編制教授困難尤多自非設法變通終恐難收實效查部奏清單原注內稱初級師範學堂可聯合兩府或三府共設一處等語直隸初級師範學堂分設保定天津灤州順德四所中學堂自保定天津兩府外皆合併二三府共設一所夫以畿輔重地財賦較足人材較多尙不能不合力通籌期規美備滇爲邊遠省分欲以一府之力兼辦完全兩校揆諸事理必有不能自應統籌兼權從新組織改用模範辦法以資提倡當飭提學司葉爾愷分電各屬調查各學堂款目生徒實數會商學務公所議紳及教育總會會長並督同各科長科員公同酌議就地理財政及生徒就學各節反覆討論擬定將全省劃爲五區

每區各設模範中學及初級師範各一堂第一區設在省城校舍用雲南府中學堂及三迤會館改辦而以澂江楚雄武定廣西等屬附之第二區設在大理府城校舍用西雲書院改辦而以麗江永昌順寧蒙化永北等屬附之第三區設在臨安府之蒙自縣城校舍用道成書院改辦而以開化廣南等屬附之併東川曲靖昭通鎮雄等屬爲第四區併普洱元江鎮沅景東鎮邊等屬爲第五區此兩區模範中學暨初級師範學堂本應分設東川普洱兩府城用兩府中學堂改辦現因經費學生均少尙難獨設一所暫附入第一區學堂所有各區學款學生均量地方公費之盈絀及人民進化之遲速分別攤派查各府原辦之中學及初級師範學堂概係兩校合設一處今仍一併聯合辦理俾得一氣銜接不至顧

此失彼惟各府原辦之師範中學各堂均於宣統二年底一律歸併辦理即以各堂原有公款按年如額解送並將原有學生悉數送入本區學堂以後仍須按年招選學生分別收入師範中學兩校中學又斟酌學生資性分別編入文實兩科似此一轉移間常款並不加增而班次既較整齊辦法亦能畫一於目前分班授課將來升班留級均屬較前便利現已籌撥開辦經費修改各堂房屋購備各種器品趕於宣統三年正月一律開學常年經費則集合數府財力足以延聘名師自監督至管教各員均擬妙選通材其外國語一科本省難覓相當教員則擬借材異地並酌訂監督資格年限及管教員年功加俸辦法俾可維持久遠陶鑄真才期副聖朝興學綏邊之至意飭據雲南提學使葉爾愷擬呈五區中學堂暨初級師範學堂通行章程詳請奏咨立案前來臣伏查滇邊興學艱難欲求稍有實際舍此別無辦法合無仰懇天恩俯准敕部立案施行除章程咨部查照外所有改良滇省中學堂暨初級師範學堂分區設立緣由謹恭摺具陳伏乞皇上聖鑒訓示謹奏

師範學堂

師範傳習所 光緒三十二年因預儲小學師資於省會及各府直隸廳州均飭令各辦師範傳習所一所設於省會者以六個月畢業設於外屬者以一年畢業並於省會傳習所內附設教員講習會以三個月爲講習期照從前校士館章程每月由各署捐給獎資壹百金發交學務處由學務處按月考試一次所給紙筆墨費每月以百

金計以六十兩分給傳習所以四十兩分給講習會傳習所畢業生分優等中等兩級優等者得充高等小學堂教員願充初等小學教員者聽中等者以專充初等小學教員為限其講習會之列於優等中等者則一律給以初等小學堂教員證書又規定委派初等小學教員酌定三缺中輪派傳習所畢業生二人講習會一人計傳習所第一班畢業八十一人第二班仍以一年畢業至光緒三十四年停辦以其地改辦兩級師範學堂附屬中學為選科生實習之用云

南教育概況及教育行政雜誌編

以上據雲

初級師範

光緒三十三年就高等學堂改辦兩級師範學堂先設

優級選科

前見

三十四年添辦初級簡易科以二年畢業宣統元年添

辦初級完全科三年簡易科生畢業停辦改設單級教員講習所又

新纂雲南通志

卷一百三十七 學制考七

一七

於省城大理蒙自三處各設初級師範學堂一所與模範中學合設

以上據雲南教育概況及李督奏摺編

女子師範

光緒三十四年就中醫學堂原有經費地址改設女子

師範學堂因無合格學生先招收初等小學八班宣統元年二月收

高等小學一班同年八月就高初等小學生攷收師範預科三班宣

統二年二月就師範預科編成師範本科一班保姆講習科一班並

就本堂對面公屋創設女子職業學堂一所宣統三年保姆講習科

畢業停辦師範則繼續辦理並推廣班次高初兩等小學辦為附屬

學校供師範生實習入民國後改名省立女子師範學校

以上據女中概覽編

體操專修科 光緒三十二年學務處遵照學部電飭以全力注重

師範案於師範傳習所及高等學堂師範部外就貢院內添設五個

月畢業之體操專修科札飭各廳州縣選派文理清通身體強健之學生一名每府直隸州各選派二名畢業後派充各小學堂體操教員其畢業考試列前二十名者並准充中學堂體操教員第一班畢業後第二班改爲一年畢業三十三年裁撤

以上據教育行政雜誌編

實業學堂

據雲南教育概況編

農業學堂 光緒三十三年將蠶桑學堂及擬辦之森林學堂裁撤之體操專修科合併爲省會中等農業學堂設農林蠶三科附設農業教員講習所亦分農林蠶三科畢業後派充各屬初等農業學堂教員

工業學堂 宣統二年開辦之高等工鑛學堂除高等外原設中等四班民國元年高等停辦改稱省會工業學校以勸業道所辦之鑛

業講習所併入之

中等以下學堂

據雲南教育概況雲南教育官報及採訪彙編

初等小學

雲南小學省會則創辦於清光緒二十九年外屬則創辦於三十年省會初小初設十一所名曰省會小學堂每所招生三班以一班爲一館故有三十三館之名彼時學章未定教科書未出版仍以四書五經爲教材名爲學堂實則義塾而已三十一年奉到部頒學堂章程省會小學始按學生程度分爲高初兩等並改稱兩等小學堂三十三年兩級師範學堂成立照章應設附屬中小學堂爰將省會兩等小學歸併爲四堂分設城內東西南北四區稱曰第一第二第三第四附屬小學堂每區附設單級一堂專收初等學生嗣又將附屬

小學名稱改爲省會模範第一二三四兩等小學堂三十四年開辦
女子師範因無合格學生先辦附屬小學初等班前見宣統元年初級
師範完全科開辦添設附屬小學外縣小學初名曰蒙養學堂自學
章頒布後始正名爲初等小學堂其程度高者則改爲高等小學堂
高等小學

滇省高等小學之創始時期與初等同光緒二十九年省會開辦之
小學不分等級三十一年學章頒布始提程度較優者別爲高等班
其後按年升級畢業均照部章辦理外縣高等小學其始亦以蒙養
學堂爲基礎嗣後逐漸推廣迨宣統元年各屬至少成立一所

土民學塾

宣統元年以永昌順寧普洱三府暨鎮邊直隸廳緊接外域而土民

又復混沌未鑿亟待教育爰就藩庫撥銀二萬兩籌設土民簡易識

字學塾一百二十八所

雲南教育概況作
一百二十五校

案河口亦設小學一校不在土塾之內

附永順普鎮沿邊學務總理李曰垓請撤去行局並擬呈土民學

塾善後辦法稟

見教育官報四
十一二兩期

敬稟者竊查永順普鎮沿邊學務行局係爲籌辦土民學塾而設
現在土塾成立自未便仍留行局致滋糜費除將行局文卷書物
另文呈繳外理合具文稟請批准撤局惟中書竊查此次籌辦沿
邊學務地兼三府一直隸廳其所屬土司頭目大小以六十餘計
其地方廣袤南北直徑近四十程東西直徑平均亦踰六七程以
如是廣闊之區域窮數月之力共創設土民學塾一百二十八所

此非中書之駑駘所能及實由各府守廳丞縣令極力提倡於上各地方紳董暨土司頭目熱心匡助於下始克稍有頭緒然以時促道遠雖勉企於成立其不免多所疏漏固意計中事申書職司攸專不敢飾詞自揚亦不敢匿情自諱謹將沿邊土塾情形之未安於心尙待改進者逐一爲大人分晰陳之一分布未能周溥也沿邊各土司地方大率皆煙瘴蒸溽入夏以後即慄不可留其煙瘴較輕及並無煙瘴之地則或山箐崎嶇零星散處無十家以上之村落或混沌未鑿異言異服有重譯不通之困難故通盤籌畫之後有因時日有限未及前往措辦而煙瘴已發者有因地僻人頑勸導布置一切無從著手者如永昌府屬之大塘隘茨竹寨明光隘滇灘隘古永隘猛板等處普洱府屬之江外猛阿猛遮頂針打洛大小猛籠江內之橄欖壩猛彝猛臘等處地勢均關重要而土塾尙付闕如又永昌府屬之卯照魯掌登埂臘撒隴川猛卯遮放孟定順寧府屬之耿馬鎮邊廳屬之猛角董西盟孟連普洱府屬之整董猛旺等處土塾雖設亦嫌其點綴之不周所未安於心者此其一一場所未盡協宜也土塾之本旨以招收土人爲主尤以招收逼近邊界之土人爲主中之主則設立土塾之場所自以專就土人多而又距邊近之地爲最宜然事勢上之困難實有與理論絕不相容者蓋專就土人村落不參收流寓漢民以爲之導則土人且疑懼而逃避專就極邊地方不遷就市廛鎮集以固其基則土塾又難成而易散故辦法略有通融至其究竟則純粹土民及緊接外界地方之土塾遂不逮漢民雜處及距邊較遠地方

之士塾之多與辦土塾本旨不無小異且凡純粹土民之地方其煙瘴必重爲外來之教員所不易耐有附近有適宜之高地夏秋可以遷移者亦有附近無適宜之高地無從遷移者其遷其否尙未一一爲之規定辦法所未安於心者此其二一名數多未足額也土塾教授用學級擔任法學生過多則教員獨力兼顧精力固虞其不勝然使學生過少則教員坐領厚脩糜款又覺其可惜故上年擬訂土塾暫行規則每塾學生名數以四十名爲足額至少不得下於二十名凡以杜虛糜課實際也自各塾開學以來土民向學之機亦頗有火然泉達之象除孟連一塾因地處窮邊學生只得十六人亦特別准予開學外其餘一百二十七塾學生名數尙無不及二十名者然能達於四十名以上者於一百二十八塾

中亦不過四分之一總計永昌府屬平均每塾得三十二名普洱府鎮邊廳屬每塾各得三十一名順寧府屬每塾只得二十二名而已揆諸籌計之初心此數總覺其尙少所未安於心者此其三一等級尙未釐定也土塾初設其所收學生語言不通者居十之四五通語言而未識之無者居十之二三其爲土司宗族子弟或爲流寓之漢民及與漢民雜處之土民平昔已自能延師教讀者纔得十之一二而已夫不通語言不識之無者自宜由簡易識字入手而平昔已自能延師教讀之子弟考其資質程度有可以收入初等小學者亦有可以附入高等小學者若能分別籌設於簡易識字學塾之外各屬均酌設完全之兩等小學以收納資質明敏程度較高之學生於辦法斯無缺陷特以期迫款紕學塾成立

以後既不暇親歷各處考定學生之程級爲之甄別而區分又不便節縮他費挪出兩等小學應需之款項爲之籌備而規定僅令各教員各就所任學塾斟酌情形分別教授其內容或不無凌亂雜糅之弊所未安於心者此其四一教員多不合格也今日師資之缺乏內地已然邊荒尤甚蓋就地既無所取材而相距鴛遠者又無術羅致惟有就鄰近州縣隨時諮訪擇其曾入學堂曾遊庠序或曾充教讀者酌量委任任用既衆斯抉擇不能過嚴此其中固亦有品學俱優不愧爲人師表者然大多數則無所謂學問也求其文理之不悖謬而已無所謂資格也求其品性之不乖張而已地方之人才有限供與求常不相應學塾之待用孔殷闕與濫勢難兩避所未安於心者此其五凡此皆瑩瑩大端爲勢所必至

目所共觀者其他隨時發生之困難問題尙不知凡幾故辦理土塾雖有聖者亦難令驟臻完全即未易顯收明效雖然勿論其收效之難不難而土塾實不可以不辦何則辦土塾而僅知求效於土塾此刻舟求劍之說也以土塾之驟難收效而遂置土塾不辦此又因噎廢食之見也夫辦一事必有一事之目的辦內地學堂之目的其要在養成國民造就人才今辦土民學塾其必不能以辦內地學堂之目的爲目的也明甚目的不同斯祈嚮亦異故中書之愚以爲今日之土塾不必求有旦夕之明效但求其影響所及足以裨益於國計邊防而已足中書邊歷邊陲內觀諸我外觀諸人於得失安危之數亦略有聞矣往者沿邊土民蕃衍殷實今則日即凋零人滿土滿前後迥異推原其故一由於土司驕侈揮

霍無度必取盈於百姓以故徵斂無藝追呼敲扑生意漸盡一由於土民顛愚謀生計拙內地之無業漢民又羣往以奪其利數十家土民有一二漢民雜處其中操縱盤剝不出十年土民必漸貧以散生存競爭之烈真有不可思議者故土民呻吟愁苦呼籲無門不自知其所以致敗之由輒歸獄於國家之歧視於是怨望之極良懦者或走死他方梟桀者遂睥睨思逞計數十年來沿邊各土司地曾不得五年無事蓋達之變亂野人山崩竜山之搶殺耿孟之互鬥卡瓦之破猛猛倮黑之躡鎮邊以及近者猛遮之拒命皆興師動衆糜款鉅萬使前人長慮卻顧早建土塾之議或者教化漸濡既隱消其獷悍不馴之氣又長養其營生之智識而堅其歸依愛戴之心雖未必盡遏其亂萌而兵禍庶幾其稍減以一度

用兵之浩費用充數年之學款而有餘而地方元氣之不致於數數斲喪又勿論已此由對內而言土塾不可不辦之實在情形也西南鄰接交緬歷次勘界失地之多方萬餘里雖曰國力實弱亦由我官民素不講求邊務稍遠之士司即置諸度外一切行政上交際上之關係若與我漠然無所涉者外人則考查聯絡無微不至故樽俎相見人則原原本本如數家珍而我則茫無把握靜聽他人之指畫假使早有土塾即教育毫無實際姑以土塾爲界牌亦保全土地之一法前車覆矣來軫方適已失之土地旣一去而不可復而外人之刻意經營方日進而未有已昔日之密支那一荒原耳今則屹然重鎮昔日之蠻暮壩一沮洳場耳今則良田萬頃其他南坎臘戍錫卜孟良皆轂擊肩摩萬商雲集與前此荒陋

情形相去不可以道里計彼其所以日益興盛之故殆亦非安坐而倖獲者十數年來墾荒開鑛築路常以絕大興舉消納無告之士人而吾邊地之窮民亦爲所吸收滔滔然如水之就下人民大去此邊庭莫大之危機此時姑藉土塾以收拾已去之人心計亦良得况外人老謀深算尤有可驚者沿邊山頭之野人性質兇悍爲自來所不易馴服自界務失敗後大部分之野人已隸外人宇下而外人即於密支那益干八募等處大開學堂專收野人子弟飲食教誨以軍法部勒之儼然無數之勁旅以彼况此已不覺愧汗之交并若並此簡單之士塾而無之彼野人且得而輕我矣此又由對外而言土塾不可不辦之實在情形也土塾之不可不辦既如此而其不易收效又如彼然則將如之何曰持之以久運之

以誠得尺則尺得寸則寸勿亡羊歧路勿擷苗助長如是而已若夫辦法之詳細曲折因時因地固有未易一一逆觀而億計者要其大體則就現在土塾之範圍以內而言有整飭之法四就現在土塾之範圍以外而言有推擴之說二行局既撤土塾無專管之機關又格於部章不能酌設土塾勸學所以專責成僅將各土塾分隸於該管廳縣之勸學所而知府直轄地方之士塾且更無所附麗此於辦法實多所不便蓋土塾所在與府廳縣治之距離有在八九程以外者官長紳董之督察其勢既有所弗逮則身繫土塾之成敗得失者勸學員而已人微責重任用一或不當則距離既遙欺飾取巧勸學員不實行查學人亦烏從而查勸學員而意外之流弊日將不可究詰故各區勸學員之委用選格宜高而督

責則不妨稍刻一經委派前往務令於所管區域內常川巡查凡所經歷地方考查事項均令逐日詳記按月送交勸學所呈請官長查核此整飭之法一也各塾教習以倉卒舉辦人不應手之故勢不能一一責備求全然師資不良匪徒無益而又有害蓋邊民之智識有限輒以一二教習而抹撥全體不逐一汰竄留良則學塾且爲人詬病故此時改良土塾以甄別教員爲第一義即形勢多所禁格當設法行之以漸或附近窮於求取更設法求之於遠以後常年辦法仍應各就所屬每屆年終舉行甄別一次若有遺缺則延聘考取兩法並用以延聘法待畢業之師範生以考取法待師範畢業生以外之人如此則棄取嚴而冗濫免此整飭之法二也各勸學員應實行勸導凡名數不足之學塾即由勸學員設

法勸集期於足額而後已各塾學生之程度亦由勸學員會同教員逐一考驗釐定班次俾便教授萬一長幼不倫程度之懸絕過甚高下相間等級之層遞太多惟有酌量變通考其地勢人情有可以合併辦理者即設法歸併各按程度分別編制程度低者編爲簡易識字班稍高者編爲初等小學班再高者亦可編爲高等小學班而各塾教員即採用學科擔任法通同教授此整飭之法三也學塾所在之地方不必一成而不變初開辦時或取其事勢之便利即不能盡求其位置之適宜以後風氣日開或現設學塾地方已自能措貲不需補助或未設學塾地方又情殷向學無款可籌應由各勸學員於查視現設土塾之餘暇遍歷土人村落及臨邊地面一面演講開導一面查看情形若果羣知向學即將自

能措貲地方之學塾次第遷往地址則自邇及遠款項則挹彼注茲至辦學日久邊地人才輩出各塾之教員不必借材內地則各塾教員之薪脩即不必照支全數視其額定之多寡或析爲二或析爲三以其一分酬教員即以其餘推廣學塾此整飭之法四也雖然此皆爲現已成立之永順普鎮沿邊各土塾說法耳尙未盡土塾應有之義也查現在土塾辦法係遵照上年奏案置重於同化主義故組織不嫌其簡單而分布務期於普徧然以事實言之地勢則爲夷爲險防禦之緩急不同人民則毗陰毗陽性質之剛柔互異此時不持同化主義固無以立可久之基僅持同化主義亦無以應一時之變蓋外人之相逼日甚敷衍對付終有情見勢絀之日若專恃各處之驕兵惰卒爲捍衛邊陲之保障此必不可

得之數雖邊地防營密布未必無庸中之佼佼然耳聞目見紀律蕩然士不用命者比比皆是此匪特治軍之弗善殆亦勢使之然良以臨時招募盡屬烏合非有選擇訓練之預備也應募遠戍藉營一飽非有身家財產之繫念也平心論之與其糜餉以養弊多利少之防兵似不若權其緩急酌裁數營即以所裁餉項添辦學堂師外人野人學堂之意而變通之其辦法則編制教練純以軍法從事其地址則專就極邊扼要地方其學生則專收性質獷悍山居耐苦之栗粟野人卡瓦等族並略收附近之漢民以參雜而監制之如此挪移辦理以一兵之月餉養學生兩名已欣欣然有喜色以一營之常款辦學堂一所更綽綽然有餘裕將來辦理有效學堂即有紀律之防營學生即有節制之精兵不惟使土民同

化又足以鞏固國防此土塾中應有之義尙待推擴者一也現辦土塾之範圍以永順普鎮三府一直隸廳爲限係爲地逼強鄰不得不思患預防起見然中書竊查西南界址北自騰越之尖高山起迤邐而南至廣南之白藤山止除由孟定上隆渡至孟連南板江口一段尙未定界外其餘分割已定偶有意外之轆轤尙有成案可查惟尖高山以北所謂北段界務者自己革迤西道石與英領事烈敦會勘後著著失敗小江邊大啞口之爭執未決下片馬之交涉以起況石革道一誤再誤竟會同烈領事直上高黎貢雪山向北勘去直抵麗江府屬蘭州邊界誠恐片馬之交涉解決循途北進不惟球夷怒夷地方損失無算即維西之鋪拉籠西藏之擦瓦龍一帶亦將淪入界外若不預占地步屆時又茫無把握欲

以口舌之力制勝氣燄方張之強鄰難矣不幸而斯言微中則外人再接再厲北指巴安西瞰衛藏皆有臥榻鼾睡之勢爲今之計似宜未雨綢繆亟就卯照迤北上迄巴安各邊要地仿照永順普鎮沿邊各土塾辦法暨外人野人學堂辦法分別籌設土塾內之可認定我固有之土地外之亦庶幾杜絕強鄰之生心此土塾應有之義尙待推擴者二也以上六者卑無高論按之事實固知其可行考諸時勢尤覺其難緩如蒙鈞裁酌奪俯賜採納前四者卽請分行各地方官督飭紳董查照辦理後二者卽請另案詳請奏咨籌辦所有中書擬請撤去永順普鎮沿邊學務行局並擬呈土民學塾善後辦法各緣由是否有當伏乞衡核訓示施行除稟督憲外爲此具稟須至稟者

職業學堂

初等農業學堂 清末滇省職業教育頗置重蠶桑一科光緒三十一年激江麗江先後請設蠶桑學堂其他各屬陸續設立數年間成立二十餘校三十三年飭各屬將蠶桑學堂改爲初等農業學堂分設蠶桑農業林業獸醫四科先辦蠶科其未設初等農業學堂地方令於兩等小學內附設蠶桑研究所凡教員學生均應實習以爲倡導而仍飭令籌設初等農業學堂迄宣統末年計有三十餘校

女子蠶桑研究所 宣統二年自省城迄各廳州縣均令創設女子蠶桑研究所又通飭女學堂並男子初級師範學堂中學堂高等小學堂於正課之外加課蠶桑一科

藝徒學堂 光緒三十二年就省會開辦半日學堂十所三十三年

改併爲藝徒學堂五所以半日在講堂教授半日在工場實習工場有紙箋織布靴鞋裁縫四科嗣又將五所併爲一所名曰省會藝徒學堂宣統二年改稱初等工業學堂繼又恢復原名

女子職業學堂 創於宣統二年分裁縫織布刺綉編物四科其辦法略如藝徒學堂於實習工藝外並加授普通學科嗣又將女子師範學堂附設之女子蠶桑研究所併入爲蠶桑科

敬節堂附設女子職業學堂 創始於宣統三年先是省會有敬節堂一所向歸鹽道管理宣統二年諮議局呈請就各慈善機關添設職業學堂乃將該堂移歸提學司管理次年學堂成立凡在堂就養之節婦及隨帶及歲之女孩概須在堂學習職業就裁縫織布織草帽各業中認習一業每日作工六小時並須學習修身國文算術等

科每日講授二小時

蒙養園

據雲南教育概況及女中概覽編

宣統三年女子師範學堂設備組織均告完備因於堂內附設蒙養園一班委陳文政為園長保師即就保姆講習科畢業生延用

私立小學

石屏州私立崇實小學光緒三十四年州人張釗紘捐款創辦由知州馬相呈准立案探訪

建水縣西區黃氏宗祠私立小學 宣統元年四月由黃寶和黃發祥黃和祥等發起並合力捐貲開辦

黎縣中區私立小學 宣統元年二月由張學忠就閤族公款創辦設於張氏宗祠及龍山書院

雲龍縣正西鄉何氏私立小學 宣統二年二月由何家鏞倡率族人以何氏宗祠田產開辦即設於宗祠內

鶴慶縣中區私立第五小學 宣統三年二月由舒良佐等捐貲開辦

鶴慶縣南區私立第四十二小學 宣統三年由趙灼昌倡辦征收學費不敷者由趙氏捐助

以上均據雲南教育概況雲南省各屬私立小學一覽表內所列開辦於清末者列入其表內有宣統四年二月設立之景東縣西區私立小學一校查宣統無四年當係民國元年之誤故不備載

大同學堂 光緒末旅滇黔人車鳴崗創立高初小學兼辦探訪

京師滇學堂 光緒三十一年秋由旅京滇人集議公舉給事中吳

煦代表電滇籌款設立就北京宣武門外珠巢街雲南會館修葺改辦滇督以同鄉京官常長津貼一萬三千餘金撥匯生息作開辦費餘由房租印結捐款等充用設備組織均尚完備

據京師滇學堂一覽編

案雲南教育概況稱雲南僻處天末經濟窘迫知識錮蔽以私人組織學校者殊不多觀查歷年統計表私立小學僅占公立小學百分之二至三而此少數之私立小學又多為私塾變象辦理合法者甚屬寥寥前清年間各縣雖已有私立小學之設立而省會則於民國九年始有私立求實小學校十年有私立正本小學校云茲就採訪所及編入石屏崇實小學及旅滇黔人暨旅京滇人所設之三校其他遺漏或所不免也

圖書館

博物館

宣統元年七月提學司札委圖書科長葉瀚就經正書院地址籌設圖書館將學務公所圖書科所存圖籍暨兩級師範學堂所存原日經正五華育材三書院書籍移置館內以為基礎並撥款陸續購置二年將前官書局各項書板移歸館儲添設管理印刷員一員校印本省出版書籍又附設博物陳列所招生肄習製造標本模型圖畫三年七月博物館正式成立

據雲南教育概況及雲南圖書館一覽編

教育總會

宣統元年雲南紳士陳榮昌等遵照學部奏定教育會章程公呈提學使組設雲南教育總會以禁煙局裁撤騰出之鹽道街公屋作會所以三迤卷金租息之半作為自治公會經費即以補助教育總會經費擬定開辦規則十九條公舉陳榮昌為會長由雲龍為副會長

經提學使刊發鈐記並詳院咨部立案其會務除依部章辦理外並有附益條件五一編印教育雜誌或日報二聯合諮議局凡本省教育應興應革事件及教育經費豫算決算各案均由會協同議決三聯合各報館互爲維持四調查本省書局印刷所及各種戲曲說書議決改良辦法條陳有司督責改良五倡辦風俗改良會議決條規宣告實行有此條件故其權責範圍甚爲廣泛當時行政機關所擬改革方案多交會議決始公布施行云

留學生

國外留學生

留日學生

光緒二十八年選送留日學生十名二十九年復送十名三十年又

送速成師範四十一名陸軍二十八名實業二十名三十一年以後多有自費赴日者因訂專章凡自費生考入日本各官立專門大學者准改給官費於是自費生愈形踴躍而考入專門大學得補官費者亦日漸增多迄宣統末年約達數百人畢業後陸續回滇均任要職

留歐美學生

宣統間曾送柳燦坤楊寶堃張邦翰等三名赴比國習建築又曾兩次選送法屬越南巴維學校學生數十名

國內留學生

雲南留學國內學生始於光緒二十七年是年送袁嘉穀施汝欽李澤孫文達席聘臣張耀曾由雲龍等肄習京師大學堂二十九年送

張崇仁覃寶琬丁其彥張士麟四名三十年又送李曰垓李華陳興廉李應謙張注東徐咸泰張鴻翼劉祖蔭等八名均入京師大學堂分習預備科及師範科三十二年布青陽尙烈楊煦何秉智康學文羅家清等六名分別送入京師大學堂附設博物實習科其後又選送若干人入京師法政學堂及經科大學惟案牘遺失其姓名無從稽考

案以上均據雲南教育概況編錄並畧參採訪其留學生姓名別詳題名表又有選派學生出洋奏摺三篇附錄如次
巡撫林紹年等選派學生出洋片

再滇省僻處邊隅民智未開自上年開辦學堂雖中西並授而教習頗難其選教法程度亦未盡合宜各廳州縣尤難遍及疊經臣

籌款陸續選派員生資遣出洋前赴日本游學並學習速成師範以期作育人材當將籌辦各情形分別奏報在案茲復選得太和縣舉人張肇興品端學裕本年會試未第飭令由京就近赴東學習速成師範籌給往返川資學旅各費銀五百五十兩又已故雲南迤南道陳宗海之子丁憂江蘇試用同知陳文起雲南試用布經歷譚光燿俱自備資斧到東游學洵屬有志上進又前委派護送二批學生出洋日本留學生監督兼漢教習拔貢知縣朱勛因病辭差自應遴員接辦以專責成查有在京翰林院編修袁嘉穀品端學正通達時務堪以派充接辦兼考究外洋政學川資薪水繙譯書識等項均照舊支給又滇越毗鄰需用法文居多法國政府現在越南河內設立學堂一切課程悉臻美備亟宜選派學生

籌給學費前往肄習既可廣開風氣尤足裨益學業當由該國領事電商河內總督據復亦甚以爲然當即考選心術端正文理明達學生文寶奎等十名每名籌給川資銀五十兩每年各給旅學費等龍圓三百元每名月費五圓委員補用知縣梁豫送赴河內學堂肄習均已據報先後起程據高等學堂總理署布政使陳燦會同洋務局司道詳請具奏前來臣覆查無異除給咨批飭令該員生等領費前往並照會編修袁嘉穀暨法國領事河內總督及咨出使日本大臣管理游學生總監督照會日本外部照約保護分別送學肄業隨時嚴加管束按期卒業給照回滇照章辦理並分咨外務部吏部禮部京師大學堂學務處南洋大臣查照外謹會同雲貴總督臣丁振鐸雲南學政臣吳魯附片具陳伏乞聖鑒

謹奏

巡撫林紹年等續遣二批學生並選員出洋游學摺

奏爲續遣二批學生並選員出洋游學及添設中學教習以宏造就恭摺仰祈聖鑒事竊滇省前經遵旨選派學生出洋游學日本取定頭批學生錢良駿等十名每名酌給行裝川資銀二百兩年給旅費學費洋銀三百元並自備資斧之廣東儘先試用知縣恩安縣舉人王志恕一員遴委補用游擊張貴祚等護送先後給資遣往曾於光緒二十八年十月十四日經前兼署撫臣魏光燾恭摺具奏奉硃批該部知道欽此旋准管理東洋游學生總監督汪大燮以滇省旅費學費不敷開銷咨滇復經酌定年各加給洋銀一百元各在案茲於在省舉貢生監及武備方言機器各堂局肄

業諸生內慎選考試復加察看恪遵諭旨取定心術端正文理明達之舉人郭有濬等十名定爲二批出洋學生照案每名給川資銀二百兩旅費學費各年給洋銀四百元俾資用度臣維儲才乃堪濟用登仕尤貴學優滇省需次人員固多而通曉諸務者實罕又以地居邊瘠莫能遠致所以每有要務異常棘手現雖開設課吏館而章程既未大備講習尤覺乏人惟有於候補各員中選其明達可造者數員一同出洋游學庶足以宏造就而備任用據司道等將候補布經歷李輝沅等五人保送前來臣覆加考驗均屬質美年優有志向上自應一併資遣其川資旅費學費仍照學生之數支給如果學成得有優等憑照回華即照學生一體考驗及奏請獎勵惟是先後所派員生已至二十六員名之多則督率自

不可無人且中學西學互相表裏日本各校雖有倫理一科究無經史專門若不專派中學教習責令兼教經史竊恐本殖荒落習染徒深轉無以植其基而澤其氣查有雲南拔貢試用知縣朱助學優才裕明幹有爲堪以委令護送前往駐東督率並充當前後游學員生中學教習教課章程應俟該員到東體察情形酌擬稟辦該員亦可藉資游歷考究外政仍先給川資銀二百兩每月酌給薪水一百兩俟三年後學生卒業即由該員護送回滇如教有成效再行仿照出洋人員從優奏獎以示鼓勵據布政使李紹芬會同高等學堂善後洋務兩局司道詳請具覆前來臣覆核無異除給咨批咨明出使日本大臣照會日本外部照約保護俟其到日查看各生資質所近分撥學堂肄習隨時嚴加管束按期卒業

給照回滇分別辦理並俟查看三月後如有不堪造就即行送回以昭慎重各該生員等定於本年五月內由滇起程除將此次考選二批各生選派各員姓名年貫開單咨送外務部吏部禮部京師大學堂南洋大臣查照外所有續遣二批學生及遣派各員出洋並派員兼充中學教習各緣由謹會同署雲貴總督臣丁振鐸雲南學政臣吳魯恭摺具陳伏乞

皇太后

聖鑒謹奏

巡撫林紹年等選派速成師範學生並續遣三批學生出洋游學片

滇省前經遵旨選派頭二批學生錢良駿等出洋游學日本曾經先後具奏均奉硃批該部知道欽此欽遵各在案伏維興學原以儲才教育端在師範滇處邊瘠民智未開延聘教習尤極不易自

上年開辦學堂雖中西兼授而教習乏人一切教法程度亦未盡合式各府廳州縣尤難遍及若不亟圖培植師範究無以宏造就而裨學業當令督同學堂司局設法籌商分行勸諭於通省品學較優之紳衿生監及本年會試舉人內慎選保送派往日本學習速成師範茲選得進士劉盛堂等四十一名自備資斧廩生張景栻指分四川縣丞附生李燮陽覆加查看均屬學裕品端有志上進定爲出洋速成師範學生庶畢業歸來足以分派並以劉盛堂等六名兼充考察學務其由滇起程者計劉盛堂等二十三名應需學費路費每名各給銀六百兩其由漢口起程者計周鍾嶽等十八名路費較省每名各給路費學費銀五百五十兩均由擬發各府直隸廳州中學堂津貼銀兩項下暫撥支用又行據普洱等

府州縣就地籌款陸續選送學生李彝倫等二十四名並由省城高等學堂挑選學生顏興賢等二十名共四十四名均經考驗尙屬心術端正文理明達定爲二批出洋學生其學費路費除各府廳州縣自行籌解外查各地方民捐積穀均已儲有定額現有餘款足以湊用計每名給川資銀一百五十兩各年給旅費學費日鈔四百元又自備資斧出洋學生蔡正緯趙舒衡二名隨同前往仍照案委學堂副辦內閣中書銜舉人揀選知縣孫光庭護送照料到日後兼考察學務惟各省出洋學生必有本省最急之務現就該學生等詳加考核如陸軍農工商鑛等擬令各按資性所近指定專門之學分門學習以歸實濟又雲南前先補用知府楊嘉紳帶同學生王詠霓陸興基俱自備資斧出洋游學洵屬有志上

進均已具報由滇起程據高等學堂總理署布政使陳燦會同善後洋務各局司道先後詳請具奏前來臣覆查無異除給咨批暨開單咨明出使日本大臣兼管游學生總監督照會日本外部照約保護俟其到日分別派入各學堂肄業隨時嚴加管束按期卒業給照回滇照章辦理並俟查看三月後如有不堪造就即行送回以昭慎重及分咨外務部吏部禮部京師大學堂南洋大臣查照外謹會同署雲貴總督臣丁振鐸雲南學政臣吳魯附片具陳伏乞聖鑒謹奏